

Uvodnik

Ovaj, 71. broj Novog Muallima otvaramo esejom akademika Enesa Karića o vrijednostima mira, svetosti, morala, vjerskog znanja i vjerske spoznaje u kontekstu pitanja o zadaći/zadaćama islamskih nauka danas. Nužnost afirmacije tih vrijednosti autor sagledava u širem kontekstu društveno-političkih i drugih (ne)prilika i katastrofa koje pogađaju muslimane svijeta i ističe, između ostalog, da “rezultati istraživanja u islamskim naukama moraju uroditi darovima duhovnog mira i spokoja te širenja moralnih vrijednosti i vjere u Boga kao radosti, a ne kao tragedije i stradanja”.

U rubrici Sagledavanja objavljujemo tekst doc. dr. Velida Efendića i dr. Alije Avdukića u kojem se predstavljaju rezultati istraživanja analize principa islamske ekonomije kroz prizmu principa društvene odgovornosti slijedeći koncept Carrollove četiri dimenzije. Ovo istraživanje pokazuje da ekonomija bazirana na principima Šerijata, ako se njeni principi snažnije implementiraju u rad finansijskih institucija s islamskim predznakom, ima potencijal u izgradnji pravednijeg društva u cjelini, između ostalog jer se ti principi u osnovama podudaraju sa svim općeprihvaćenim principima društvene odgovornosti.

U ovoj rubrici objavljujemo i prilog prof. dr. Fikreta Karčića pod nazivom “Pozicija Jugoslovenske muslimanske organizacije u toku priprema za formiranje koalicione vlade Stojadinović-Korošec-Spaho (od 5. maja do 24. juna 1935.)”.

U septembru ove godine Fakultet islamskih nauka Univerziteta u Sarajevu obilježio je značajan jubilej četrdeset godina djelovanja Fakulteta. Tim povodom razgovarali smo s dekanom prof. dr. Zuhrijom Hasanovićem o prošlosti, sadašnjim prilikama i perspektivama ove najznačajnije islamske visokoškolske ustanove u Bosni i Hercegovini.

U rubrici Muallim objavljujemo tekst dr. Enes Svrake koji predstavlja analizu Finalnog mektepskog takmičenja na nivou Rijaset Islamske zajednice u Bosni i Hercegovini koje je uspostavljeno 1998. godine. Ova analiza pokazuje značajne indikatore prvenstveno muallimima i muallimama, istrajnim pregaocima u razvoju i afirmaciji mektepske nastave, ali i organizatoru takmičenja koji na osnovu ovakvih analiza ima mogućnost projicirati potencijalne nasljednice i nasljednike, nosioce bremena misije unutar institucija Islamske zajednice, i isto tako, promicatelje vrijednosti baziranih na principima islama u cilju izgradnje bolje, pravednije i snažnije Bosne i Hercegovine. Organizator takmičenja, Rijaset IZ u BiH, na osnovu ovakvih analiza, nadamo se, planirat će i jasnije kreirati ambijent u kojem će djevojčice i dječaci koji su pokazali znanje, volju i hrabrost u ovim takmičenjima, u skoroj budućnosti imati priliku brinuti o našem zajedničkom dobru. U istoj rubrici vašoj pažnji preporučujemo i tekst Mirzeta Ibrića o ulozi nastavnika vjeronauke u savremenoj školi; nastavnu pripremu za čas vjeronauke za III. razred srednjih škola autora Hikmeta Hekića, te kao prilog i peto poglavlje knjige dr. Mohameda Ismaila *Savjeti i djelotvorne strategije u nastavi – za mektebe i vjeronauku u javnim školama*, u prijevodu Ifeta Mustafića.

U rubrici Islamske teme objavljujemo članak hafiza dr. Elvira Duranovića pod nazivom “Ka očuvanju islamske tradicije Bošnjaka: rasprava mostarskog muftije Mustafe Sidki Karabega o hutbi”, u kojem autor, na osnovu analize jedne rasprave iz 1864. godine, ukazuje na važnost djelovanja službene uleme u slučajevima odstupanja od ustanovljene institucionalne prakse u tumačenju vjerskih propisa.

U istoj rubrici objavljujemo i tekst prof. dr. Almira Fatića pod nazivom “Semantika *umjerenosti* u Izvorima islama” u kojem autor, uz kratak pregled rasprave o *umjerenosti islama i u islamu* u dvadesetom stoljeću i navode o razlozima za promicanje ovog diskursa o islamu, semantički analizira izraze *wasat*, *iqtiṣād*, *i’tidāl* i *tarwāzun* – koji se u izvorima islama, Kur’anu i hadisu, koriste za pojam umjerenost.

U rubrici Pregled Vašoj pažnji preporučujemo i pet značajnih publikacija, čije prikaze objavljujemo u ovom broju.

Senada Tahirović